

Schee, dassde merr was verzählt host

Ei Kättche, was hosde dann, du humbelst joo doorum?

Ich habbs e bissi omm Knie, Lisbett.

Omm Knie? Warsde schunn beim Dokter?

Naa.

Ei warum dann nit?

Ich hatt noch koo Zeit.

Koo Zeit! Ferr so ebbes muss merr immer Zeit hawwe. Also ich saach derrs, wenn ich so was habb dann loss ich merr gleich enn Termin beim Dokter gewwe. Merr derf so was nit ostieh losse. Moi Nochbern, die Else, die hatts aach omm Knie. Moonsde die wär zum Dokter gonge? Die hott genau wie du immer gesaat, sie hätt koo Zeit. Jetz hottse Zeit. Weil noochdem die e gonz Johr mett ihm Knie erum gemacht hott wars zu spät. Wörn Se frieher kumme, Frau Essich, hott de Ordopäde gesaat, doo hätte merr nor enn kloone Oigriff ze mache brauche, jetz misse merr Ihne e gonz nei Knie enoimache. Die vorsch Woch isse operiert worrn unn jetzt uff oomol hottse Zeit, weil se noch drei Woche in die Reha muss. Odder hosde Ängst vorm Dokter?

Ich habb koo Ängst, ich habb koo Zeit.

Du brauchst koo Ängst ze hawwe, dir musses joo nit so geh wie de Schwiechermutter von moine Tochter. Die hatts onn de Schulter gehabt, unn als die ins Kronkehaus gonge iss – die iss vor drei Johr in Heidelbersch vom Professor Luna operiert worrn, dess iss e gonz bekontt Konifer –, ei die iss joo nimmi erauskumme. Die hatt sich dort so enn Virus oigefonge, waasde, so ooner wie merrn nor im Kronkehaus kriecht, so ooner mett so Residenze, wo koo Antibiotika mehr helfe dut. Ei die hott heit noch droo ze lecke, dere ihm Darm spillt immer noch verrickt nooch dene gonze Pille die die nemme must. Ich will derr joo koo Ängst mache, awwer sowas wünsch ich moim beste Feind nit, naa, naa. Saach emol, du hosts doch aach mett de Bondscheib ze due? – villeicht kumme doi Beschwerde aach von de Wirbelsäul. Letzt Woch im Fernseh habb ich dess geseh, so Schmerze strahle aus, doo moonsde du hästs im Knie unn doodebei hosdes onn de Wirbelsäul. Ich hadd joo aach emol so e Sach, doo bin ich gelaafe von oom Dokter zum onnern unn kooner hott was gefunne. Dann habb ich in de Zeidung gelese, dasses owwe im Westerwald so enn Knocheflicker gibt, unn zu dem sinn merr hiegefahrr. Der iss uff so emm Bauernhof, der behonnelt die Leit in soine Wohnstubb, unn warte musst merr in de Kich. Ich saach derrs, doodroi hawwe so um die zwonzisch Leit gesotze, drei Stunn hotts gedauert bis ich drookumme bin. Der Monn, der iss schunn iwwer achtzisch, hott enn blaue Arweitskittel oogehabt unn e kariert Hemd unnedrunner, unn wie ich uff den zugonge bin, hott der mich von owwe bis unne oogeguckt unn doo wusst der schunn was merr fehlt.. Dann musst ich mich uffem Bauch uff soi Konnebee leeche, unn dann drickt der mir joo so mett Wucht uffem Rückkreiz erum, ich habb gekrische vor Schmerze, awwer uff oomol warnse weg. Soll ich derr emol die Adress gewwe ... was iss?

Ich muss jetz hoom, ich muss moim Monn was Gutes koche.

Machs gut, Kättche, awwer schee dass merr uns widder emol geseh hawwe unn dassde Zeit gehabt host mir was von doine Kronkheit ze verzähle.

Eiern Honnes.